

## ZAPISNIK SA JAVNE RASPRAVE

Za Studiju o procjeni utjecaja na okoliš u postupku izdavanja okolišne dozvole za izgradnju male hidroelektrane (MHE Buna 1 i Buna 2), investitora „Hercegovina građevinsko zanatstvo” d.o.o. Podružnica – Obnovljivi izvori Mostar

**DATUM:** 09. 07. 2015.

**MJESTO:** prostorije Osnovne škole "Buna"

**VRIJEME:** 11:00 h

### DNEVNI RED:

~~AD1. Prezentacija zakonskoga temelja u postupku izdavanja okolišne dozvole (predstavnik Federalnog ministarstva okoliša i turizma)~~

AD2. Prezentacija Studije o utjecaju na okoliš (predstavnik konzultanta)

AD3. Diskusija, pitanja, odgovori.

~~AD1. Prezentacija zakonskoga temelja u postupku izdavanja okolišne dozvole (predstavnik Federalnog ministarstva okoliša i turizma)~~

Predstavnik Federalnog ministarstva okoliša i turizma – gđa. MIRJANA KOVAČ – voditelj postupka, je na početku pozdravila prisutne, zahvalila im se na dolasku na ovu javnu raspravu te detaljno predstavila zakonsku osnovu u postupku izdavanja okolišne dozvole, kao i da je formirano stručno povjerenstvo koje će u zakonskom roku dati svoje stručno mišljenje u ocjeni Studije o procjeni uticaja na okoliš.

Obrazložila je prisutnima rok od 15 dana od dana održavanja javne rasprave za dostavu mišljenja i sugestija u pisanoj formi Federalnom ministarstvu okoliša i turizma.

AD2. Prezentacija Studije o utjecaju na okoliš (predstavnik konzultanta)

Prezentacija SUO – Dragan Miličević, JP ELP HZHB – sažeta prezentacija Studije utjecaja na okoliš za okolišne dozvole za izgradnju male hidroelektrane (MHE Buna 1 i Buna 2), investitora „Hercegovina građevinsko zanatstvo” d.o.o. - sadržaj prezentacije, uvod, opis projekta, opis uticaja, mjere koje se uvode za smanjenje negativnog uticaja na okoliš i zaključak.

AD3. Diskusija, pitanja, odgovori.

**\*NAPOMENA:** javna rasprava je održana u prostoriji u koju nisu mogli svi učesnici stati, a tokom prezentacije projekta i diskusije učesnici javne rasprave su na ne adekvatan način za javnu raspravu i diskusiju postavljali pitanja, komentirali i pričali u isto vrijeme, čak i nakon opomene voditeljice upravnog postupka, te je bilo veoma teško voditi zapisnik na propisan način i zapisati sva uglas postavljena pitanja te odgovore!

MIROSLAV BARIŠIĆ – MZ Mlinice - korito Bune je sedra koja se već urušava od izgradnje mosta na dužini od 47m! Bez istraživanja i mjerenja ste podnjeli zahtjev za okolišnu dozvolu! Na kojoj dužini će se graditi MHE? Od ušća Bune do ? Interesuje me također ko sad zatrpava ove kanale? Smatram da će nakon izgradnje MHE ljeti Bunac presušiti a zimi će da plavi podrume okolnih kuća. Niste naveli koliko kubika vode će se vraćati? Nikada niste kao elektroprivreda vodili računa o lokalnoj zajednici pa tako smatram da nećete ni u ovom slučaju!

DRAGAN MILIČEVIĆ – Naša istraživanja pokazuju da na predmetnoj lokaciji nema sedre već čisti konglomerat, tako da će uticaj MHE biti minimalan!

STOJAN ČORIĆ – već sada 90 metara i od Bune i od Neretve mi se nalazi kuća i svake godine plavi, a smatam da će nakon izgradnje ove MHE još više plaviti. Prije je Buna predstavljala čisti turistički potencijal, a sad nema nikakv, smatram da trebate ulagati u tom smjeru, a ne u MHE!

MARIO MILIČEVIĆ – u Buni obitava autohtona zaštićena vrsta ribe i to Zakonom zaštićena! Interesuje me kako mislite riješiti mrijest ribe iz Neretve u bunu? Da li bi postajala uopće ta mogućnost? Koje je rješenja za autohtonu pastrmku i njen prirodni tok kretanja?

DRAGAN MILIČEVIĆ – naravno da smo i tome vodili računa – na mjestu zhvata postojaće 2 velika otvora koja će biti stalno otvorena za mrijest ribe!

MARIO MILIČEVIĆ – to što sad pričate je sve u teoriji, molim Vas da mi date neki od dobrih primjera iz prakse – iz prethodnih uspješnih projekata! Činjenice, tehničke rezultate, količine?

DRAGAN MILIČEVIĆ – imate veliki broj pokazatelja iz cijelog svijeta! Naprimjer u Jajcu na plivskom jezeru imamo sličnu situaciju!

STOJAN ČORIĆ – Molim Vas da nam kažete ko je vlasnik ovih mini hidroelektrana?

DRAGAN MILIČEVIĆ – Investitor je „Hercegovina građevinsko zanatstvo” d.o.o. Mostar.



Predstavnik sa Agronomskog fakulteta Mostar – ja ću Vam govoriti o ihtiofauni sa naučnog stanovišta: Tražili smo kroz izradu ovog projekta mjere zaštite okoliša i ihtiofaune sukladno Zakonu o zaštiti okoliša i Zakonu o slatkovodnom ribarstvu jer želimo da pomirimo naš rad struke u zaštiti riba sa tehničkim rješenjima MHE za investitora.

MAJA ROGO POPOVAC – prvi problem koji sam uočila u ovom projektu je Bunska strana, obala! Bunski kanali su jedina stvara u ovom okruženju koji su netaknuto prirodno dobro! Zašto u projektu ne uraditi više na zapadnoj strani? A manje na Bunskoj strani? Moj prijedlog je da što se tiče i ribljeg fonda, i prirode i privatnog vlasništva je da se prebace radovi na zapadnu stranu, jer u suprotnom, ljudi će se uvijek bunuti oko istočne strane! Također me interesuje zašto se u ovom projektu izabrao baš biser prirode, zašto ne neka manje zahtjevnija lokacija?

DRAGAN MILIČEVIĆ – u ovakvoj vrsti projekata uvijek se ide na najjednostavnije i opravdanije tehničko izvodljivo rješenje.

ZDRAVKO ČORIĆ – investitori su sa Bune uzeli sve što valja, osiromašili lokalnu zajednicu a ovo će da prodaju Europi! Na ovoj javnoj raspravi je trebalo donjeti maketu, da ljudi mogu da vide kako će projekat izgledati, 60% ljudi ovdje ne zna šta je presjek! Da li znate da je na ovoj lokaciji održano EU prvenstvo na divljim vodama? A danas je to prvenstvo odvedeno na Vrbas!

SAMIR DIZDAREVIĆ – ribolovac – dajem podršku stanovništvu Bune kao član odbora ribolovnog društva. Ljudima u ovoj lokalnoj zajednici elektroprivreda još uvijek nije isplatila naknade za oštećenja od poplava. U zadnjih 9 godina, elektroprivreda je samo jednom vršila poribljavanja! Kako da Vam sad vjerujemo kad elektroprivreda ni do sada nije poštovala zakon? Ko nam garantira da će u budućnosti vršiti obeštećenje?

DRAGAN MILIČEVIĆ – ja sam učestvovao u sastavljanju tužbi, i obeštenja bi trebala biti uskoro!

LAZO RAJIĆ – EKO Jasenica- divim Vam se na hrabrosti na razini Federalnog ministarstva okoliša i turizma da branite ovaj kapitalistički projekat! Tehnički opis me ne interesuje nikako, ovdje stanje flore i faune nije opisano i objašnjeno kako treba, niste doveli nikoga od stručnjaka da objasni situaciju! Moj je zaključak da se ovo ponovo pripremi na bolji način, i održi nova javna rasprava!

MIRJANA KOVAČ – FMOIT - mi ne podržavamo ničije stavove, već samo radimo svoj posao. Vodimo upravni postupak po Zakonu i Pravilnicima. Kada nam dođe od investitora Zahtjev za izdavanje okolišne dozvole, pokrećemo upravni postupak, a ova javna rasprava je dio tog upravnog postupka po Zakonu.

Stanovnik Blagaja – njima direktno trebamo reći ako nismo za ovaj projekat!  
Trebamo reći da nismo za ovaj projekta i zašto nismo za ovaj projekat. I da se javna rasprava treba organizovati na bolji način – ja vam govorim samo o Zakonskoj regulativi!

MIRJANA KOVAČ – FMOIT - ovim završavam Javnu raspravu!

## ZAPISNIK SAČINILA

Bevanda Maja

*Maja Bevanda*